

REGIONAL NEWS

HEADLINES:-

1. Kumin Lok Sabha inthlanpui lo awm turah Congress party candidate turin MPS (ret'd) Pu Lalbiakzama an an ruat.
2. Vairengte Forest Range Staff leh Excise & Narcotics tangkawp ten tun thla ni 5-a Saphu kawr Kgs98 vel an man chhuizuina kal zelah mi pahnih an man.
3. Election Commission chuan Ministry of Electronics and IT Ministry chu Whatsapp kaltlanga Viksit Bharat message thawn darh tawh lo turin a hriattir.
4. Indian Railways chuan Holi boruakah mipuite nuamsa taka an veivah theih nan rel 540 a tlan tir dawn

<><><>

MPCC LS CANDIDATE

Mizoram Pradesh Congress Committee chuan kumin Lok Sabha inthlanpui lo awm turah an party candidate turin MPS (ret'd) Pu Lalbiakzama an an dah.

MPCC President Pu Lalthanzara chuan vawiin khan an candidate tur hi puangin MNF nena Common candidate nei tura inbiakna a awm tawh a ti a, an neih leh loh chhan chu BJP bei tur ber an nih avang leh MNF in NEDA an thawhpaina an tih tawp theih loh vang anih thu a sawi.

Congress Candidate tur Pu Lalbiakzama hi an chungkuain Aizawl Model veng - ah an cheng mek a, Kum 2012 June thlaah Home Department-ah Joint Secretary a post a ni a, Home Department-ah hian a pension thleng awmin Secretary thlenga kaisangin Mizoram Police Service atanga Home Secretary ni hmasa ber a ni.

Home Department-a a thawh chung hian Mizoram Sorkar leh Tripura sorkar aiawhte nen Bru chungchanga inbiakna ah vawi eng emawzah Mizoram ai a aw h a, Mizoram sorkar leh HPC 'D' te remna zawnga inbiaknaah Mizoram aiawh Team Leader niin hlawhtling takin inremna an ziahpui thei a, he mi zarah hian Sinlung Hills Council a piang a ni.

Lok Sabha inthlan lo awm turah hian Party thenkhat ten candidate puang tawhin Mizorama rorel lai ZPM chuan Richie Vanlalmangaiha an ruat a, PC Party in Rita Malsawmi ruatin Pu Lalhriatrenga Chhangte chu independent in a chuh dawn a, naktukah hian MNF Party in an candidate tur an puang dawn a, BJP erawh central lamin an puang dawn niin state-a an thuneituten an sawi.

<><><>

HEALTH MINISTER

Chennai-a a thlawna Lung lam thalo zai ngai zai zingah mi 18 hlawhtling taka zai an ni.

Health Minister, Pi Lalrinpuii hmalaknaa, Lung lam thalo zai ngai, Chennai-a Sri Ramachandra Medical Center, a thlawna zai tur ruahmanna siamah, Batch hmasa ber ah mi 19 kaltir an ni a, an zinga 18 chu hlawhtling takin zai an ni tawh a, 1 chu zai hmaa inenkawl la ngai phawt a niu.

Kumin February-a Cardiac Camp ZMC a buatsaih atangin Lung zai ngai te hi hmuhchhuah a ni a, Chennai ah a thlawna enkawl na an dawn hnuah nimin khan thenkhat lo haw te Health Minister ruahmanna in Lengpui Airport ah hmuah an ni a, an mahni In lama an haw hmain an hriselna dinhmun te enfiah leh vek an ni.

<><><>

DGP VISIT KOLASIB

Director General of Police (DGP) Pu Anil Shukla chuan vawiin khan Kolasib tlawh in, SP office Conference Hall-ah Kolasib District chhunga Police te a kawm.

Pu Anil Shukla hian Mizorama DGP hna a chelh hnuah Kolasib SP office leh Police hmun a tlawh vawi khatna a nih thu a sawi a. Kolasib District chu Mizoram mipui nitin mamawh lakluhna kawngpui in a paltlang anih avangin a pawimawh thu a sawi. Bungrua chi hrang hrang a luh rualin Zu, Ruihhlo leh thil dang thalo pawh a luh tel avangin Police te thawhrim a ngaih bik thu a sawi.

DGP chuan, Mizoram chu Zu khapna State a nih avangin Zu leh ruihhlo leh thil dang thalo a luh loh nan uluk leh zual a Duty a tul thu a sawi a, Police Duty zingah dan pel a che an awm thu Complaint an dawng thin chu pawh a tih thu sawi in, tun hnaia Vairengte Police Checkgate a thil thleng chu in siam that nan hmangin, dan bawhchhe nawn tawhlo turin a chah a, a thawhpui Police te chungah Action lak hrehawm a tih thu leh hrem ngaia awmlo turin Police kalkhawmte chu a chah ani.

DGP chuan, Kawngpuia tlan thin lirthei enkawltute hnen atangin Police nilo; pawl thenkhat ten sum leh thil dang an khawn thin ni a sawi awm chu tireh turin SP in thuchhuah siam a tul thu a sawi a. Assam leh State dang Registration nei Lirthei; a bik in Car vei vak tam lutuk chu vei-awm a tih thu leh heng lirtheite hian Zu leh Ruihhlo leh thil dang an phur em tih Dan bawhchhe silova check thin turin DGP chuan Police te a chah bawk.

He hunah hian Kolasib SP Pu David H. Lalthangliana, chuan Kolasib District chhunga Police Station hrang hrang leh DEF dinhmun a sawifiah a. Kolasib District Police in chak zawka hna an thawh theihna tura an mamawh hrang hrangte DGP hnenah hian a thlen nghal a, SP hi Addl SP Pu C. Lalsawta leh Officer leh thawktu dangten an tawiawm.

DGP hova SP Conference Hall-a an inkawm zawh hian DGP chuan SP office chamber ah Kolasib District MJA hruaitute kawm in, MJA hruaitute hian Kolasib District chhunga Police indaih lohna leh Police chetvelna atana Lirthei an indaih loh thu an thlen a. DGP chuan, Mizoram ah hun rei tak Police lakbelh anih tawh loh thu sawiin, Pension a chhuak an awm reng bakah a then an thih avangin Police indaih lohna chu a nasat telh telh thu a sawi.

<><><>

PANGOLIN SCALES

Vairengte Forest Range Staff leh Excise & Narcotics tangkawp ten tun thla ni 5-a Saphu kawr Kgs98 vel an man chhuizuina kal zelah mi pahnih an man.

Forest Department chuan Lalzuithangi (kum 41) Champhai leh Vanlalzawni (kum 42) Zemabawk, Aizawl te chu manin, nimin tlai khan District Jail-ah dah luh an ni a; an mi man zinga Lalzuithangi hi Wildlife Crime Control Bureau te pawhin hun engemaw chen atanga an lo chhui tawh a ni.

Pi Margaret Lalramchhani, Divisional Forest Officer, Kolasib-in a thuchhuah siama a tarlan dan chuan, tun thla ni 5 zing dar 4:40 vela Vairengte Forest Range Staff leh Excise & Narcotics tangkawp ten Saphu kawr hi phailam atanga an rawn phur chhoh chu an man a; lirthei khalhtu Laldaniela Shillong mi ni a inchhal an man a, lirtheiah hian amah chauh a chuang a ni.

Hemi thubuai chhui zuina kal zelah hian hetiang lam sumdawna lama a zawmpui te chhui chhunzawm nghal a ni a, inhnawih ngei nia hriat mi pahnih, Lalzuithangi Champhai leh Vanlalzawni Zemabawk, Aizawl te chu man an ni a; Aizawl lam atang in mi pakhat, Laltanpuia, Bethlehem Vengthlang, Aizawla khawsa mek chu man a ni bawk.

Tarlan tawh angin Saphu kawr hi Vairengte Excise Check gate-ah Shillong leh Aizawl inkar Maxicab service atanga man a ni a; Maxicab khalhtu hian Counter nghaktuten 'Vawksa rep' ti a an sawi thu leh Counter-a dah tura an tih anga phur mai a nih thu alo sawi tawh a ni.

<><><>

WORLD DOWN SYNDROME DAY

Enkawlna hranpa leh mamawh bik nei Down Syndrome nei te Ni bik World Down Syndrome Day pualin waviin khan Mizoram hmun hrang hrangah hun hman a ni.

World Down Syndrome Day hi kum tin March ni 21 ah hman thin a ni a, he ni hi khawvel huapa hman turin 2012 khan United Nations pawhin alo pawm tawh a, waviin khan Aizawl ah pawh he ni pual hian Gilead School leh mi hrang hrang te chuan Mizoram Down Syndrome Association huaihawtin kawng an zawh a ni.

Kolasib ah pawh he ni pual hian hun hman niin Resource Person Pu ZR Thafala, Principal, SIRD & PR, Kolasib chuan enkawlna hranpa leh mamawh bik nei, Down Syndrome neite leh an chungkuate pual a hun buatsaih a ni chu lawmawm a tih thu sawiin 'World Down Syndrome Day' pual a hun hmanna hian Down Syndrome avang a harsatna thuhmun tawk mek chungkua te inkarah inpawhna leh a tul hun a intanpui tawna kawngah hmasawna a thlen ngei a beisei thu a sawi a.

Harsatna lian tak a lang pawh a huho a hmachawn a nih chuan hun hlimawm leh hriatreng tlak ah a siam theih thu sawiin Down Syndrome vang a harsatna nei chungkua te chu tanrual a pawimawh thu a sawi. Pu ZR Thafala chuan Down Syndrome nei nau piang an awmin nu leh pa ten dawnsawn an thiam theih nan Damdawi inah hemi kawng a thiamna nei, Counsellor an awm a pawimawh thu a sawi a, mamawh bik nei a piang an nih angin an chenpui chungkua te inpekna a pawimawh hle thu a sawi bawk a ni.

<><><>

INDIGENEOUS GAMES

Saitual District huam chungga Branch YMA te tana buatsaih, Mizo infiamna (Mizo Indigenous Games) hmanga intihsiakna tan a ni.

DDK Aizawl leh Mizoram Indigenous Games Association (MIGA) buatsaih, Mizo infiamna (Mizo Indigenous Games) hmanga intihsiakna hi ni 2 awn tur a ni a, Intihsiakna hmun tura ruahman hmasak Saitual Public Playground chu khaw awm danin a zir loh avangin Saitual Auditorium ah chawpchilh taka insawn a ni.

Mizoram Indigenous Games Association President Pu MS Dawngkima chuan thu sawiin, chhak, thlang, chhim leh hmar ramri depa ramri venhim ÷ul an tih angin pi leh pute atanga rochun infiamna te chu humhim a, chhawm nun zel a pawimawh a ni, a ti a, hnamdang infiamna entawn ringawta hun hmang ral te chu hnam ding chhuak an ni ngai lo tih sawiin YMA te pawhin hnam infiamna chu sum tamtak sen ve ngai lo awlsam taka tih mai theih a ni a, chawi nung a, humhalh thar zel tura sawmin, "DDK leh MIGA ten intihsiakna hun remchang an siam chu lawmawm atih thu a sawi.

District huap intihsiaknaah hian YMA Branch 10 atangin infiammi 180 vel an tel thei a, intihsiakna chi 5, Mizo inbuan, Inarpathai, Insuknawr, Insaihrupawh leh Inkawibah hmangin intihsiakna hi neih tur niin, naktuk hian zawh hman tum a ni a, intihsiakna tina a tiþha pakhatna aþanga pathumnate chu District aiawhin State level intihsiaknaah an tel leh ang.

<><><>

NE OLYMPIC GAMES

North East Olympic Games 2024 neih mekah Mizoram chuan vawiin khan medal pasarih an la a. Nagaland-a inelna neih mekah hian Mizoramin vawiin tlai thleng khan medal 13 an la tawh a ni.

Vawiin khan Mizoram Table Tennis team chuan mipa singles huangah gold medal an la. Jeho Himnakulhpuingheta chuan final-a a khingpui Manipur mi Khelendrajit Yenkhom chu 4-1 in a hneh.

Mizo tlangval Alberto LR Ruata chuan singles huangah hian bronze medal a hlawh chhuak ve bawk. Mizoram TT team hian tun tum NE Olympic Games-ah hian gold medal pahnih, silver medal pakhat leh bronze medal pakhat an vaw chhuak a ni.

Infiamna dang Sepaktakraw huangah pawh Mizoram team hian vawiin vek khan silver medal pakhat leh bronze pathum an hlawh chhuak bawk a ni. Chanchinthar puan lai thleng hian infiamna peng hrang hrangah inelna neih mek zel a la ni bawk.

<><><>

EC ON IT MINISTRY

Election Commission chuan Ministry of Electronics and IT Ministry chu Whatsapp kaltlanga Viksit Bharat message thawn darh tawh lo turin a hriattir. EC sawidanin inthlanpui puan anih tawh hnuah pawh hetiang thuthawn hi mipuite phone ah a darh nasat thu dawn a ni a. Hetihlai hian Ministry lam chuan Model Code of Conduct hman anih hmian heng lekhathawn te hi thawn chhuah a ni a, khawl leh network chiang lo avangin a hun aia tlaiah mi thenkhatin an dawng niin an sawi.

<><><>

RAILWAYS

Indian Railways chuan Holi boruakah mipuite nuamsa taka an veivah theih nan rel 540 a tlan tir dawn. Union Railway Ministry sawidanin heng relte hi ramchung khawpui liante an tan tlang vek dawn a. Rel tlanna tur te hi Delhi-Patna, Delhi- Bhagalpur, Delhi-Muzaffarpur, Delhi-Saharsa, Gorakhpur- Mumbai, Kolkata-Puri, Guwahati- Ranchi leh New Delhi- Sri Mata Vaishno Devi Katra te an ni a. Kum hmasa nen tehkhinin Holi laia rel tlan belh tir hi 219 in a tam zawk a. Railway Protection Force te pawh an dah belh leh dawn a ni.

<><><>